

P R E F A C E.

est remply d'un tres-grand nombre de personnes, que le desir d'insulter à cette nouvelle façon de Philosopher, ou du moins la curiosité de sçauoir ce qui en estoit, a fait aller à l'assemblée qui se tient tous les Mecredis chez Mr Rohault, tres-sçauant Mathematicien, & fort expérimenté dans les Mechaniques, & celuy de ma connoissance qui est le plus versé dans cette Philosophie, lesquels, après auoir esté surpris de la nouveauté de ses discours, après auoir esté conduits à l'Intelligence des Matieres qu'il traittoit par sa facilité & sa maniere de s'expliquer, après auoir esté conuaincus par la force de ses demonstrations, & pleinement persuadez par la iustesse & la conuenance que les experiences ont avec ses raisonnemens, ont enfin esté contraints de donner les mains, & d'ennemis ouuerts qu'ils estoient de cette doctrine, de s'en declarer les sectateurs & les deffenseurs.

J'ay crû estre obligé de donner cet auis, afin que ceux qui pourroient douter de la verité de ce que j'auance, en fassent eux-mesmes l'épreue, & qu'ils en viennent informer leur esprit par le témoignage de leurs yeux; Je suis assuré qu'ils s'en retourneront entierement satisfaits, & qu'ils m'auront obligation de les en auoir auertis. Le grand nombre de personnes de condition qui se trouuent en cette Assemblée (où les Dames mesme tiennent souuent le premier rang) & qui n'en sortent iamais qu'avec applaudissement & admiration, doit conuier tous ceux qui ont quelque desir de connoistre & de se détromper, à l'honorer quelquesfois de leur presence, &

